

E cantidad di heroe cu tin na Aruba actualmente

Mi a tope pafo di entrada di Setar ayera merdia.

El a puntrami si mi no ta kere cu Sydney Ponson mester ta e figura di e aña aki, idolo di muchanan y heroe di Aruba?

"Mi no sa kico pa contesta señora. Mi ta masha fastioso den asuntonan asina y hopi biaha tin miedo di expresa mi opinion", mi a bise.

"Bo no ta kere cu mi tin razon?" el a puntra e ora ey.

Mi a djis bise cu **"Sydney ta idolo di hopi riba nos isla, grandi y chiquito, pasobra el a logra loke mayoria di nos no a logra y hopi lo no logra nunca."**

El a keda satisfecho cu e contesta ey.

Loke ta pasando ta cu nos ta mira mucho television americano, unda continuamente ta tende di **"American Hero"**.

Baseball?

Nan ta lubida cu baseball tin hopi mas involvi cu djis tira bala, dal bala y core.

Basebolistanan tin hopi cos cu ta preocupa nan constantemente, hasta ora nan ta riba cama.

Esnan di liganan grandi sigur ta preocupa pa espacio pa por staciona tur nan autonan luhoso, pasobra despues di e di tres Mercedes, Ferrari, Lexus, nan no tin lugar mas pa nan di 4 of di 5 auto.

Nan tin cu kibra cabez cada inning di wega riba dianan di calor inmenso, sin cu bo ta mira nan ta grawata, y tin di nan cu ta pasa den henter un wega asina sin scupi.

Casi tur dia, no ta importa nan tamaño, nan ta sacrifica pa dreña den e carson cu ta mucho preta na nan curpa.

Unda cu nan bay, cantidad di hende straño ta bula riba nan pa autografia y mayoria di e hendenan aki ta lubida di bin cu cartera pa paga algo.

Unda cu nan bay, muherman ta flirt rond di nan y nan tin dificultad pa dicidi cual di e galiñanan nan ta hiba cas of hotel.

Pa mi, logronan deportivo o atletico so no ta traha un heroe.

Den mi buki, un heroe ta un persona cu corage y noble cu ta sacrifica pa otronan -- ademas di por tin un carson preta na curpa.

E HEROENAN LUBIDA

Nos ta yen di heroe rond di nos pero no ta honra nan pasobra nos ta mucho ocupa na honra peloteronan, atletanan, actornan, musiconan, cantantenan etc.

Heroe entre otro ta e militarnan Arubiano cu ta risca nan bida na Irak actualmente. Nan ta den un guerra (di terrorismo) ariesgando nan bida pa mundo biba cu mas seguridad.

Heroenan ta e voluntarionan cu ta sirbi esnan di menos recurso y cu miles di nos ta lubida di pidi pa un autografo.

Nos maestro y maestranan di school ta heroenan tambe pasobra nan ta dedica nan bida na educa otronan.

Si no tabata pa nan, nos yunan awe lo no ta asina educa pa por compronde delaster cos cu ta aparece riba pantaya di un telefon celular of weganan di video.

Apesar cu hopi biaha mi sa tin mi critica pisa riba polisnan, mi tin cu admiti cu nan tambe por ser considera como heroenan, sin importa cuanto **"boet"** nan a duna nos.

Nan ta proteha nos di malhechornan, incluso ladronnan, narcotraficantenan, secuestradornan y otro criminalnan.

Sin polisnan nos lo mester di sistema di alarma di seguridad rond di nos cas y nos yunan lo mester carga arma pa proteccion.

Nos por critica polis pa tur cos, pero ora algo pasa nos, e prome cu nos ta yama ta polis, aunke cuanto nos por ta contra nan actitud na varios ocasion, of no ta gusta polis.

Ta nan tin cu para dilanti e bala cu ta ser dispara riba nos.

Ta e tipo di hendenan aki, e militarnan den guerra, voluntarionan, maestro y maestranan di school y polis ta esnan cu mester ta para fin di aña na television ricibiendo homenaje y ovacion. Nos mester por bisa nan cu cara na laira **"boso ta nos heroenan!"**.

E ANTI HEROENAN TAMBE MESTER DI REGALO

Ora papia di heroenan, mester corda cu tin esnan cu ta nan contrario. Esaki mi ta yama e **anti-heroenan**.

Aki mi tin cu cambia di pensamiento atrobe, pasobra nan tambe ta hende cu merece regalo di Pasco.

Lesando e pida aki riba y loke ta bin awor, un lector bon di cabez, lo bisa cu mi a cambia 180 grado, pero lesa y compronde loke bo a lesa

ta dos cos difrente.

Un drumi mas, y nos ta den Pasco.

Nos ta sinti nos mes caba como hendenan generoso, decora cas y kerstboom, y awe ainda mester haci e ultimo compranan, lubidando di haci **"un donacion caritativo"** pa yuda nos **"elemento criminal"** local.

Si! E criminalnan tambe ta celebra Pasco y no tin nada cu nan gusta mas tanto cu mira hopi hende den caya riba otro, den pacusnan ta dal den otro, y duna nan asina tanto oportunidad di **"practica nan ofishi."**

No ta pornada a sali e advertencia contra rateronan, e pickpocketnan, e carteristanan.

Como cu nos ta asina bon educa, y ta kere cu nos sa tur cos caba, y ningun hende tin nada di siña nos, mihor mi duna un conseho mas pa por yuda e **"empresarianan ambicioso"** aki y segura nan di un Pasco exitoso y feliz.

Awe ora bo bay haci compras, staciona bo auto banda di un edificio unda no tin trafico, y percura cu bo auto ta accesible pa ladronnan. Corda bon, ta Pasco y no tin nada cu un ladron gusta mas cu un lugar unda e lo no wordo mira of ripara ta **"practicando su arte"**.

Ora bo baha di auto un caminda y ta pafo di un pacus of den un pacus, tuma tempo pa tira un bista rond di bo. No bira paranoico.

Den mayoria di caso e mucha homber para den cercania ta papiando na telefon celular, no ta djis un comprador manera abo y no un malhechor buscando un victima. Kizas e hasta por pidi bo pa lague yudabo carga saco.

Despues di haci compras, djis laga bo saconan den auto, y no perde tempo pa cera nan den bual.

Ladronnan gusta haci **"window shopping"**, esta tira un bista den bentana mira kico tin paden, y pa casualidad por mira algo den auto cu nan ta gusta.

Asina bo ta duna nan e facilidad di kibra bentana di auto ora nan mira algo cu ta bale la pena pa nan horta.

Telefonnan celular, tas, cartera y pakinan di Pasco ta regalanan di gratitud pa ladronnan, y sigur bo familia lo no preocupa cu kico nan a perde di haya pasobra nan no a mira nan.

Ora bo sali pura di auto, sin cera e portanan na lock, e ladronnan sa cu bo ta bolbe mes ora, pesey nan ta **"cumpli cu nan talento"** mas lihe posibel.

Ora bo dreña un pacus yen di saco, percura pa no laga nan na caha of den cashi unda tin seguridad. Asina bo ta yuda e malhechor di **"logra su dia"**.

Si bo a sali di auto y laga portanan habri, ta pasobra bo no ta corda cu ladronnan gusta haci nan compras di Pasco pafo, mientras cu bo ta haci bo compras paden.

Si bo ta prefera di haci donacion den efectivo na lugar di producto compra, percura cu bo ta cana cu tas yen di placa, of cartera yen di placa, na man of den saco, na lugar di cheque of credit card. Encurasha e rateronan canando cu bo tas los na schouder, bo cartera visible den saco patras of den man.

Placa en efectivo no por wordo rastrea of cancela y rateronan lo aprecia esaki hopi di bo.

Si bo yega cas sin haci donacion na un ladron, ratero of choller cu mal intencion, pone bo regalanan bao di kerstboom banda di bentana, unda nan por wordo mira di pafo.

Mientras bo ta for di cas gozando di bo actividadnan navideño, **"ladronnan talentoso"** por bay cu e regalanan cu ta lora caba y segura nan familia un Pasco Feliz.

Un ladron bon actor, cu no a mira nada cu ta bale la pena pa e horta, por hasta bati na bo porta di cas pidi un donacion pa caridad, sabiendo cu den e temporada di Pasco bo ta den beis di **"haci bon"** y **"yuda"**.

No pone sinti berguenza puntrando pa e identifica su mes of bise cu bo ta duna solamente na obranan di caridad conoci y di confia.

Sea generoso y yuda un persona den mester.

Esaki ta e dia di aña cu bo por sostene esnan di bida abao den nos sociedad.

Si bo ta un blanco facil, lo ta mas facil ainda pa malhechornan logra nan meta.

Cu ponemento di atencion y cu bo percura di ta mas cauteloso bo ta sigur bo mes di pasa un feliz Pasco hunto cu bo familia.

Si bo duna, no duna mucho generoso y semper corda cu **"abo tambe por ta un victima di crimen awe"**.

Mi mensahe estilo celular lo ta: **Flz Psco na tr lctr.**

Juby Naar.